



ДУНДГОВЬ АЙМГИЙН
ГАЗРЫН ХАРИЛЦАА, БАРИЛГА ХОТ
БАЙГУУЛАЛТЫН ГАЗАР
УЛСЫН (АХЛАХ) БАЙЦААГЧИЙН
ЗӨВЛӨМЖ

2025.05.30 № 02-28-01/072/01

БАРИЛГЫН ЗАХИАЛАГЧ,
ГҮЙЦЭТГЭГЧ БАЙГУУЛЛАГУУДАД

Барилгын угсралтын ажлын үеийн
хөдөлмөрийн аюулгүй байдлыг
хангуулах тухай

Барилгын угсралтын ажил гүйцэтгэх явцад хөдөлмөрийн аюулгүй байдлыг бүрэн хангаагүйн улмаас эдийн засаг, эд хөрөнгийн хохирол учрах цаашлаад хүний амь нас, эрүүл мэнд хохирох нөхцөлийг бүрдүүлж байна.

Иймд хөдөлмөрийн аюулгүй байдлыг чанд мөрдөж ажиллахад онцгой анхаарч, эрсдэлээс урьдчилан сэргийлж, **"Барилгын үйлдвэрлэлд дагаж мөрдөх хөдөлмөр хамгаалал, аюулгүй ажиллагааны дүрэм" БНБД 12-03-04, "Цахилгаан тоног төхөөрөмжийн ашиглалтын үеийн аюулгүй ажиллагааны дүрэм", "Хэрэглэгчийн цахилгаан тоног төхөөрөмжийн техник ашиглалтын дүрэм"**-ийн дагуу дараах арга хэмжээг авч ажиллахыг **ЗӨВЛӨЖ** байна. Үүнд:

1. Мөрдөж буй хууль дүрэмтэй нийцүүлэн байгууллага, аж ахуйн нэгжийн хүрээнд хөдөлмөрийн аюулгүй ажиллагааг хангах үүргийг ажил олгогч хариуцна.

2. Хөдөлмөрийн аюулгүй ажиллагааг хангах ерөнхий удирдлага нь байгууллагын дарга эсхүл байгууллагаас томилсон албан тушаалтанд оногдоно.

3. Үйлдвэрлэлийн талбай дээрх зам, гарц, түүнчлэн ажлын байр руу очих зам ба ажлын байр нь эмх цэгцтэй, цэвэр цэмцгэр байдлыг хадгалахын зэрэгцээ, хог, цаснаас цэвэрлэгдсэн, хураалттай материал ба бүтээцээр дүүргээгүй байвал зохино.

4. Хамгаалалтын хашаа нь дараахи шаардлагыг хангасан байна.

Үүнд: - Үйлдвэрлэлийн талбайн хайс, хашааны өндөр нь 1.6 м-ээс, харин ажлын хэсгийн хайсны өндөр нь 1.2 м-ээс багагүй байна. - Хүмүүс олноор борчих газарт тулгаж тавьсан хашлага нь 2 м-ээс багагүй өндөртэй байхаас гадна, хамгаалалтын үргэлжилсэн саравчаар тоноглогдсон байвал зохино. - Саравч нь цасны болон бусад ачааллын үйлчлэлийг даахаар тооцогдон хийгдсэн байна. - Хашлага нь ажил гүйцэтгэх хугацааны турш хяналт тавьж байх зориулалттай, ажил дууссаны дараа хааж түгжигддэг явган болон дааман хаалгатай байна.

5. Энэхүү норм дүрэм, MNS5079:2001 -ын шаардлагын дагуу агуулах, хадгалах материалыг өөрөө шилжих, суух, нурах, гулсах, өнхрөхөөс урьдчилан сэргийлэх арга хэмжээ авч, тэгшлэн зассан талбайд материалыг байрлуулбал зохино.

6. Материал, бүтээц, эдлэхүүнийг хашаа, мод, барилга, түр байгууламжид налуулан байрлуулахыг хориглоно.

7. Шатах, хурдан авалцах, галын аюултай материал агуулж байгаа байранд тамхи татахыг хориглох ба 50 м-ээс илүү зайд ил гал гаргах ба ашиглахыг зөвшөөрнө.

4875110001

8. Талбайд шатахуун тосолгооны материал хадгалах (тостой алчуур, модны үртэс, зоргодос болон хуванцар хаягдал) —ыг хориглох ба харин тэдгээрийг аюулгүй байранд хаалттай төмөр чингэлэгт хадгалбал зохино.

9. Гал эсэргүүцэх тоног төхөөрөмжийг байнгын бүрэн бүтнээр, ажлын бэлэн байдалд байлгавал зохино. Гал эсэргүүцэх тоног төхөөрөмжид хүрэх зам, талбайг ямагт чөлөөтэй байлгахаас гадна зохих таних тэмдэг, заалт тавигдсан байвал зохино.

10. Тэсрэх, галын аюултай ажлын байрыг гал унтраах анхан шатны болон болзошгүй аюулыг шуурхай мэдээллэх хяналтын хэрэгсэл, багаж тоноглолоор иж бүрэн хангаж, ажлын бэлэн байдалд байлгавал зохино.

11. Ашиглагдаж байгаа бүх төрөл, марк, зориулалтын автомашины тусгай зориулалтын тоног төхөөрөмж нь автотээврийн хэрэгслийн аюулгүй ажиллагааны дүрмийн шаардлагыг хангаж байвал зохино. Замын цагдаагийн газар, Автотээврийн газар, тээврийн хяналтын бусад газраас зохион байгуулдаг техникийн улсын үзлэг, тооллого явуулах журмын дагуу жил бүр техникийн үзлэгт хамрагдсан байна.

12. Машин, тээврийн хэрэгслийг байрлуулах, ашиглах үед салхины үйлчлэлээр туугдаж шилжих, тухайн газрын хөрсний суулт, налалтаас болж онхолдох аюулаас урьдчилан сэргийлэх арга хэмжээг авсан байвал зохино.

13. Барилга угсралтын ажил гүйцэтгэхэд хэрэглэх дүүжин шат, вандангийн бүтээц нь ГОСТ 27372-87 стандартын шаардлагыг хангасан байвал зохино.

14. Цахилгаан, хийн гагнуурын ажлыг гүйцэтгэх үед энэ бүлгийн болон Монгол Улсын галын аюулгүй байдлын тухай хууль, MNS5150:2002, ГОСТ 12.3.003-86, ГОСТ12.3.036-84, "Гал түймрийн улсын хяналтын дүрэм"-ийн шаардлагыг биелүүлбэл зохино.

15. Цахилгаан, хийн гагнуурын ажил гүйцэтгэх тухайн төвшинд болон түүнээс доогуур байрлалтай эгнээнүүд (шатдаггүй хамгаалалтын болон шатдаггүй бамбай байхгүй үед) дэх ажлын байрууд нь шатамхай материалаас 5м-ээс багагүй, харин тэсрэх аюултай материал, төхөөрөмжөөс (хүчилтөрөгчтэй баллон, хийн генератор ба бусад) 10 м-ээс багагүй радиуст байвал зохино.

16. Гагнуурын байнгын цэг, байраас гадна гагнуурын ажил гүйцэтгэхдээ галын аюулгүй байдлыг хариуцсан ажилтны бичгээр олгосон зөвшөөрлөөр тогтооно.

Гагнуурын ажил хийх байрыг гал унтраах багаж хэрэгслээр хангасан байвал зохино.

17. Ажилтан нь ажил олгогчийн баталсан байгууллагын хөдөлмөр хамгаалал, аюулгүй ажиллагааны дүрэм зааврыг заавал биелүүлэн ажиллана.

Ажилтанг ажилд орох, эсхүл өөр ажилд шилжүүлэх үед хөдөлмөр хамгаалал, аюулгүй ажиллагааны дүрэм зааврыг танилцуулж, гарын үсэг зуруулж хувийн хэрэгт хадгална.

18. Барилга байгууламжийн угсралт, буулгалтын ажлыг гүйцэтгэхдээ барилгын ажлын талбайн болон үйлдвэрлэлийн зохион байгуулалтын зураг төсөл боловсруулан мөрдөж хөдөлмөрийн аюулгүй ажиллагааг хангах;

19. Хөдөлмөрийн аюулгүй байдлыг хангуулахад барилгын талбай, нэгж хэсэг дээр инженер, техникийн ажилтнуудын оролцоог нэмэгдүүлэн тэдгээрийг томилон ажиллуулах;

20. Ажил олгогч нь дотоод хяналт шалгалтыг хөдөлмөр, хөдөлмөрийн аюулгүй байдлын чиглэлээр тогтмол хийж хэвших, биелэлтийг тооцож ажиллах, хөдөлмөрийн аюулгүй байдлыг тэмдэг, тэмдэглэгээг зурган хэлбэрээр гаргаж, хүний нүдэнд харагдахуйц газар байршуулах, аюулгүйн бүсийг тодорхойлж ажиллах;

21. Өргөх, зөөх, тээвэрлэх машин механизмын аюулгүй байдал, техникийн бичиг баримтанд оношилгоо, үзлэгт орсон тэмдэглэгээг бүрэн даруулсан байх,

22. Барилга угсралтын ажлын байрны орчны хөдөлмөрийн аюулгүй байдлыг хангах, 1.5 метрээс дээших өндөрт ажиллаж байгаа ажилчдад өндрийн бүс хэрэглүүлж хэвших, өндрийн хаалт хамгаалалт, хашлага, тор татах ажлыг хийж аюулгүй байдлыг хангаж ажиллах.

23. Барилга угсралтын ажил гүйцэтгэхдээ өргөх зөөх машин механизм ажиллуулах явцад өндөр хүчдлийн цахилгаан дамжуулах агаарын болон кабель шугам, дэд станцын хамгаалалтын зурвас газрын зайн хэмжээг зөрчихгүй ажил гүйцэтгэх, ашиглалтын байгууллагад мэдэгдэн ажилд оруулах.

24. Цахилгаан тоноглол, тоног төхөөрөмжийг хариуцан ажиллаж байгаа холбогдох ажилтныг хамгаалах багаж хэрэгслэл, аюулгүй ажиллагааны зааварчилгааг өгч ажиллах.

25. Ашиглаж байгаа цахилгааны кабель ил задгай, олон залгаатай утас ашиглахгүй, гэмтлийг арилгаж техникийн аюулгүй байдлыг хангуулах.

Энэхүү зөвлөмжийг үйл ажиллагаандаа мөрдөж, үүсч болзошгүй эрсдэлээс урьдчилан сэргийлэх арга хэмжээг нэн даруй зохион байгуулж 2025 оны 06 дүгээр сарын 15-ны дотор тус байгууллагад мэдэгдэнэ үү.

БАРИЛГЫН ТЕХНИКИЙН ХЯНАЛТЫН
УЛСЫН АХЛАХ БАЙЦААГЧ

ЭРЧИМ ХҮЧНИЙ ХЯНАЛТЫН
УЛСЫН АХЛАХ БАЙЦААГЧ

Э.ЦЭРЭННАДМИД

Б.ЗОЛЖАРГАЛ

